

# 1 Theilsaqlolni

## *Gevq-a nail gaq*

Haoqgavq niil keiv iqmoeq ilmoeq bhai gaqkhoel Paolluv aivq-i mail gevq-a nail ngaol dai, gevq-ai thaq nail ngaol. Al ovqtavq, milnee uqnee khe Khali yaq juq iqsanl, Paolluv-i mail gevq-a nail ngaol dai, noeq nail ngaol.

## *Gevq-a nail aqyanq khi mail aqduq*

Gevq-a nail aqyanq neq, A.D. 51 kovq niidai bhai gevq-a nail ngaol. Gevq-a nail aqduq neq, gaqkhoel Paolluv milkhaoq doi dai, lavqkhiq tsail nail geeqlaoq daoq cavq cavq-ail tsao nail nvq pov teevq pov bhai, Gaolliqthu meenq bhai jaol khi gevq-a nail ngaol.

## *Khaq sil gaq bhai gevq bhiq-a nail*

Haoqgavq niil keiv neq, Theilsaqlolni meenq bhai jaol nail Khali yaq munl bhai gevq bhiq-a nail ngaol. Theilsaqlolni meenq neq, ngaqkha daoljail bhai jiav khi jaiq gaiq jaiq kha kha nail al jaiq-ail mao nail meenq meenq ma teevq meenq ngaol. Tsaol-aq nvq sainv gaq niidai jaol nail ngaol. Theilsaqlolni Khali yaq munl neq, Paolluv-i mail daoqthaoq thaoq-a nail ngaol. A bhai khe Khali yaq jemao Yuldav tsaol-aq maq ngel dai, yuq nail jeq-e jaq-a ngaol.

## *Khul bhai noeqthunq khi gevq-a nail*

Gaqkhoel Paolluv lavqkhiq tsail nail geeqlaoq daoq cavq nail ngel-i mail, Theilsaqlolni meenq

bhai jaol nail tsaol-aq teevq pav ganav juq thaoqphaoq aqma maolkhoel bhai uqhuq thaoq nail khaonq ha-ail ceevq khi Khali yaq pevq lal-a nail ngaol. Paolluv Theilsaqlolni meeq nee mail lavqtsail mail ya dov lee-a nail ngel-i mail, khal cavq movq nail phaqaq maq ya cavq dan-a nail bhaqda nee haoqgavq niil keiv gevq khi, khoeq nail jiovq nail phaqaq bhai neema ivqdao dai, ya daq nail ngaol dai, gaq bivq-a nail ngaol. Khali yaq aqdoevq khalhai ya doevq khi, yovqgavq nail nlmaoq hal dao bhai aqmeeq-ai nl yaoq dai, gaq bivq-a nail ngaol. Al taivq-ail maq ngel dai, Yeiqsul Khali nvq pov teevq pov maldil yavq kha lee nail ngaol dai, gevq bhiq-a nail haoqgavq pevq nail ngaol.

*Iqmoeq ilmoeq khe daoq*

<sup>1</sup> Ngal Paolluv, Siqlav khi Tilmolseiqaq nvjuq hail gaq, Aqbhu Miqyail khi mail Heeqphaqaq Yeiqsul Khali nail lavqkhoel bhai jaol nail, Theilsaqlolni meenq khe Khali yaq munl juq bhai haoqgavq niil gevq bhoel-ai leevq-a nail ngaol. Geeqlaoq eeljaol khi mail neesal-ovq nail phaqaq nuljuq nail kovtavq bhai jiaq dei-eiq.

*Theilsaqlolni meenq bhai jaol nail Khali yaq juq nail neema thaqtsaol nail phaqaq*

<sup>2</sup> Nvjuq Miqyail bhai khaqaq mao iqsanl geeqlaoq hal-u phao, nuljuq iqsanl nail haqbhoil tsiqeeq tsiqeeq-ail, Miqyail bhai geeqlaoq hal nail ngaol.  
<sup>3</sup> Ngadao nail Aqbhu Miqyail nail sivtavq bhai, nuljuq neema thaqtsaol nail bhaqda nee, khalhai nl dol hal dol lavq-a nail ganl bhai maqkhaiq,

goil nail gaiq-a nail bhaqda nee, khadai laijai khi nl thailthaiq nail ganl bhai maqkhaiq, nuljuq Heeqphaq Yeiqsul Khali bhai noeqthunq nail bhaqda nee neema ivq nail bhai maqkhaiq, Miqyail bhai khaq mao iqsanl geeqlaoq hal-u phao, nvjuq noeq kev nail ngaol.

<sup>4</sup> Miqyail gaiq-a nail aqivq jaqbheq juq-ol, Miqyail nuljuq bhai tsel dov-ai thaq nail, nvjuq heeq kivq nail ngaol. <sup>5</sup> Khul khi mail dai ngal-aq neq, nvjuq-i mail cavq-a nail lavqkhiq tsail nail geeqlaoq daoq neq, daoq taivq-ail nuljuq jaol nail bha ge bhiq lee-a nail maq ngel-ail. Meeqnail Haolnail Aqhaqlal nail bhaqaoq lavqkhoel nee maqkhaiq, lavqkhiq tsail nail geeqlaoq daoq al maldil tsaq naol dai, neema thaqtsaol nail lavqkhoel nee maqkhaiq, nuljuq jaol nail bha kev lee-a nail ngaol. Nvjuq nuljuq nee mail jaol-u phao, nuljuq nail haqbhoil ganl tsoiq dai, nvjuq aqdoevq khalhai doevq-a nail bhai, nuljuq heeq nia nail ngaol. <sup>6</sup> Nuljuq nvjuq bhai maqkhaiq, Yeiqsul bhai maqkhaiq, saol oil-a nail ngaol. Khul khi mail dai ngal-aq neq, geeqlaoq daoq bhaqda nee, haq nail aog nail pha q bhai nuljuq ya daq deedee khi ngaol-aog, Meeqnail Haolnail Aqhaqlal-i mail bivq-a nail lavqkhiq tsail nail pha q teevq bheeq aol nail lavqkhoel, geeqlaoq daoq al bhai nuljuq hav bhoel-a nail ngaol. <sup>7</sup> Alheel ngel-i mail, nuljuq neq, Maqgeiqdaolnil milkhaoq khi, Aqgaqyal milkhaoq bhai jaol nail, neema thaqtsaol nail tsaol-aq iqsanl nail haqbhoil, saol oil duq pevq lal-a nail ngaol.

<sup>8</sup> Khul khi mail dai ngal-aq neq, nuljuq bhaqda

nee Miqyail nail daoq neq, Maqgeiqdaolnil milkhaoq khi Aggaqyal milkhaoq bhai gaiq doi ail-a nail ngaol. Al ovqtavq, nuljuq Miqyail bhai neema thaqtsaol nail ganl yaoq dao yaoq-ao nee gaiq doi ail-a nail ngel-i mail, nuljuq nail ganl al nvjuq teevq pov gaoq ge bhiq nail, maq loq yaoq-aol. <sup>9</sup> Nvjuq nuljuq jaol nail bha lee-u phao, nuljuq nvjuq bhai khalhai hav lavq-a nail ganl khi mail, maldil tsaq khi maldil doevq nail Miqyail bhai uqhuq thaog nail haqbhoil, nuljuq thaogphaog aqma maolkhoel bhai khalhai khaonq-ail ceevq khi, Miqyail jaol nail phao kovq lal-a nail ganl bhai, yu iqsanl mail ge thailthaiq nail ngaol. <sup>10</sup> Al ovqtavq, Miqyail-i mail bhi doevq kovq lal-a nail aivq nail Yaqyov nqtavq kovtavq nee yavq kha lee nail bhai, nuljuq noeqthunq khi daonq nail bhai iqsanl, yu ge thailthaiq nail ngaol. Yaqyov al gaq neq, yaqhao khe kev lee nail Miqyail neema phail nail pha q nee ngadao bhai bhi jel-ail lavq nail, Yeiqsul ngaol.

## 2

### *Paolluv-i mail Theilsaqlolni meenq bhai nl-a nail ganl*

<sup>1</sup> Aqivq jaqbheq juq-ol, nvjuq nuljuq jaol nail bha lal-a nail neq, aqnieivq maq ngel-ail dai, nuljuq iqsanl heeq nia nail ngaol. <sup>2</sup> Nuljuq heeq nia nail khe-ai, nvjuq neq, nuljuq jaol nail Theilsaqlolni meenq bhai maq lee kev-u nee mail, Pillilpiv meenq lavqkhoel bhai khoeq nail

jiovq nail phač khi, khal nl movq-ail nl lavq-a nail phač bhai ya dač-a nail ngaol. Nuljuq bhai Miqyail nail lavqkhiq tsail nail geeqlaoq daoq cavq lal-u phao, lav tsoiq nail maodai phač jiav khi ngaol-aq, ngadao nail Miqyail bhačda nee nvjuq geesil nail neema mač aol dai, cavq lal-a nail ngaol. <sup>3</sup> Nvjuq khač mao iqsanl cavq bhiq cov bhiq-u phao, noeq bheeq noeq leel-ai thač nail lavqkhoel nee cavq bhiq cov bhiq-a nail mač ngel-ail. Al ovqtavq, neema mač haol nail lavqkhoel nee mačkhaiq, goiqbhačq bhačq nail lavqkhoel nee mačkhaiq, cavq nail cov nail iqsanl mač ngel-ail. <sup>4</sup> Nvjuq lavqkhiq tsail nail geeqlaoq daoq cavq nail neq, Miqyail neema tsač nail nee ovqtavq, aivq bhi cavq lavq-a nail khe-ai taivq-ail nvjuq cavq nail ngaol. Alheel ngel-i mail, tsaol-ač neekhaol sil dai cavq nail mač ngel. Nvjuq nail neema bhai tsaol tsel daiq nail Miqyail neekhaol sil dai, cavq nail ngaol.

<sup>5</sup> Nuljuq heeq nia nail khe-ai, nuljuq bhai nvjuq tsiqphoiq khi cavq bhiq-a nail mač ngel-ail. Yu nail nlmaoq bhai maivjeel jeel nail ngel-i mail cavq bhiq-a nail iqsanl mač ngel-ail. Miqyail neq, nvjuq nail hačbhoil salkhil pevq nail ngaol. <sup>6</sup> Maldil dai, ge hač neq, nvjuq Khali nail gačkhoel pevq nail ngel-i mail, nvjuq bhai bhi ev movq hač neq, bhi ev kivq nail ngaol. Thailhai ngaol-aq, tsaol-ač-i mail bivq lavq nail seiqlaiq khaoqsail bhai mačkhaiq, nuljuq-i mail bivq lavq nail seiqlaiq khaoqsail bhai mačkhaiq nvjuq mač halpov-ail. <sup>7</sup> Nvjuq nuljuq nee mail jaol-u phao, neema neenuq neebeiv aol nail lavqkhoel nee ačtsil cuvq yač ačma

aivq nail yaq bhai heldaiq phail nail khe-ai, nvjuq heldaiq phail-a nail ngaol. <sup>8</sup> Nvjuq nuljuq bhai gaiq-a deede nail ngel-i mail, Miqyail nail lavqkhiq tsail nail geeqlaoq daoq taivq-ail nuljuq bhai cavq bhiq nail maq ngel dai, nvjuq nail aqmaol iqsanl nuljuq nail haqbhoil bivq movq nail neema jiav nail ngaol. Khul khi mail dai ngal-aq, nuljuq neq, nvjuq mailma-ail gaiq-a nail tsaol-aq pevq lal-a nail ngaol. <sup>9</sup> Alheel ngel-i mail, aqivq jaqbheq juq-ol, nvjuq khadai haq haq-ail laijai khi ganl nl-a nail bhai nuljuq heeq nia nail ngaol. Nuljuq bhai Miqyail nail lavqkhiq tsail nail geeqlaoq daoq cavq-u phao, nvjuq nail haqbhoil nuljuq bhai khul nail ganl iqsanl maq bhi dal dai, nvjuq nqkiv n-gaol maqkhaiq, ganl nl-a nail ngaol.

<sup>10</sup> Neema thaqtsaol nail nuljuq bhai, nvjuq-i mail khal nl khal hal bhiq-a nail pha q neq, meeq nail haol nail pha q, tsa q nail daol nail pha q khi mail oeqbal tha q du q ma q jiav nail pha q pevq nail ngaol dai, nuljuq iqsanl, Miqyail iqsanl salkhil pevq nail ngaol. <sup>11</sup> Al ovqtavq, aqbhu teevq ga q yovqgavq nail ya q ju q bhai heldaiq phail nail khe-ai, nuljuq yaoq ga q yaoq-ao nee bhai nvjuq cavq bhiq cov bhiq khi ga q bivq-a nail ngaol dai iqsanl, nuljuq heeq nia nail ngaol. <sup>12</sup> Aivq nail milkhaoq khi seiqlaiq khaoqsail nail lavqkhoel bhai aol lal yaoq dai, nuljuq bhai khul thailthaiq nail Miqyail neema tsa q dai, aqdoevq doevq nia nail haqbhoil, nvjuq nuljuq bhai ga q bivq khi hal nail ngaol.

<sup>13</sup> Miqyail bhai nvjuq maq ceiv lai dai tsiqeeq nail ganl yaoq pha q yaoq neq, niailhai jiav nail

ngaol. Nvjuq nuljuq jaol nail bha Miqyail nail daoq cavq lee-u phao, tsaol-aq nail daoq dai, saol-nvq khi nuljuq hav bhoel-a nail maq ngel-ail. Maldil Miqyail nail daoq nial dai, saol-nvq khi hav bhoel-a nail ngaol. Daoq al daoq neq, neema thaqtsaol nail tsaol-aq pevq nail nuljuq nail lavqkhoel bhai ganl nl thailthaiq nail ngaol. <sup>14</sup> Aqivq jaqbheq juq-ol, Yuldav milkhaoq bhai jaol nail Miqyail nail munl pevq nail Yeiqsul Khali bhai neema thaqtsaol nail juq bhai nuljuq saol oil-a nail ngaol. Yuldav nail tsaol-aq aqyu juq bhai khoeq bhiq jiovq bhiq-a nail khe-ai, nuljuq nail milkhaoq bhai jaol nail tsaol-aq nuljuq bhai iqsanl, alhai khoeq lavq jiovq lavq nail ngaol. <sup>15</sup> Yuldav nail tsaol-aq al juq neq, Heeqphaq Yeiqsul bhai tavq heivq-a nail ngaol. Al ovqtavq, Miqyail nail haqbhoil gedan nail juq bhai iqsanl deeq heivq khi nvjuq bhai iqsanl khoeq lavq jiovq lavq khi the dov lavq-a nail ngaol. Aqyu juq neq, Miqyail neema tsaq dai maq nl nail nee ovqtavq, tsaol-aq iqsanl bhai neejlav jlav nail ngaol. <sup>16</sup> Yu nail jeq-e jaq-a hevqkovq nail pha q ya nia dai, nvjuq cavq bhiq nail bhai, Yuldav nail tsaol-aq al juq lav tsoiq nail ngaol. Aqyu juq khaq mao iqsanl nl nail oeqbal bhee lal dai, niailhai nl-a nail ngaol. Thailhai ngaol, haoqnao naosaq neq, Miqyail nail neema phail nail pha q, aqyu juq nail kovtavq bhai kev lee nail ngaol.

*Paolluv aqyu juq jaol nail bha maq ya lai-a nail ganl*

17 Aqivq jaqbheq juq-ol, nvjuq nail aqmaol nuljuq nee teevq yanq ya pav-ail khi ngaol-aog, neema neq, nuljuq nee mail jiav nail ngaol. Alheel ngel-i mail, nuljuq nail maivphaoq bhai moel movq deedee lal khi, lai-jai-a nail ngaol. 18 Nvjuq nuljuq jaol nail bha kovq lal movq nail ngaol. Ngal iqsanl nuljuq jaol nail bha mee nia pov bhee dai lal movq nail ngaol. Thailhai ngaol-aog, neivq Saqdaq neq, nvjuq bhai lav tsoiq nail ngaol. 19 Ngadao nail Heeqphaq Yeiqsul yavq kha lee khi mail, ngadao aivq nail sivtavq bhai ya jaol-u phao, nvjuq nail noeqthunq duq, lavqkhiq tsail duq khi mail, nvjuq nail neema eeq duq heel uqtsaoq neq, nuljuq ngaol. 20 Khul khi mail dai ngal-aq nuljuq neq, maldil nvjuq nail lavqkhiq tsail duq khi neema eeq duq pevq nail ngaol.

### 3

1 Alheel ngel-i mail, nvjuq nuljuq nail ganl maq ya heeq maq ya gaiq mail maq jaol thaiq tsaol dai, pevq lal-a nail ngel-i mail, nv-nvq gaq taivq-ail Aqtheiq meenq bhai jaol-ail ceevq nail haqbhoil noeqceiv-a nail ngaol. 2 Aq-u phao, nvjuq nee mail teevq gaq khe-ai, Khali nail lavqkhiq tsail nail geeqlaoq daoq cavq nail Miqyail nail ganl nl thailthaiq nail nvjuq nail jaqbheq Tilmolsei q bhai nuljuq neema tha q tsaol nail pha q ivq lal dai, gaq bhi bivq nail haqbhoil nvjuq khoel-ai leevq-a nail ngaol. 3 Khoeq nail jio vq nail pha q bha qda nee neema tha q tsaol nail pha q bhai nuljuq maq ya kha onq-ail ceevq nail haqbhoil khoel-ai leevq-a nail ngaol. Khoeq nail jio vq nail pha q bhai ngadao Khali ya q juq ya



daq nail ngaol dai, nuljuq heeq nia nail ngaol. <sup>4</sup> Alheel ngel-i mail, nvjuq nuljuq nee mail jaol-u phao, “Ngadao khoeq nail jiovq nail phağ bhai ya daq nail ngaol” dai, nuljuq bhai ge bhiq-ai thağ nail ngaol. Khal ge-ai thağ nail khe-ai bheeq lal thailthaiq nail ngaol dai, nuljuq heeq nia nail ngaol. <sup>5</sup> Ngal nuljuq nail ganl mağ ya heeq mağ ya gaiq dai mağ jaol tsaol lal-u phao, nuljuq neema thağtsaol nail phağ khalhai pevq nail bhai ya heeq kivq dai, Tilmolseiğ bhai khoel-ai leevq-a nail ngaol. Neivq heeqphağ nuljuq bhai jalmul mul ya khi, nvjuq-i mail nl doil hal doil-a nail phağ aqnieivq-ail pevq-ail nail khul-il dai, ngal khaoqlaol deedeē nail ngaol.

*Tilmolseiğ-i mail cavq gaiğ lee-a nail daoğ*

<sup>6</sup> Thailhai ngaol-aog, niil aq-il Tilmolseiğ kovq kev lee khi, nuljuq Yeiqsul bhai neema thağtsaol nail bhai mağkhaiq, teevq gağ nee teevq gağ goil nail gaiğ-a nail bhai mağkhaiq, aivq nvjuq bhai lavqkhiq tsail nail daoğ ge lavq-a nail ngaol. Nuljuq khağ mao iqsanl nvjuq bhai noeq kev nail bhai mağkhaiq nvjuq khağ mao iqsanl nuljuq bhai moel movq nail khe-ai, nuljuq iqsanl nvjuq bhai moel movq deedeē nail ngaol dai, aivq ge lavq-a nail ngaol. <sup>7</sup> Alheel ngel-i mail, aqivq jaqbheq juq-ol. Nvjuq hağ nail aog nail khoeq nail jiovq nail phağ bhai ya dağ khi ngaol-aog, nuljuq neema thağtsaol nail ganl bhai ya gaiğ-a nail ngel-i mail, nvjuq nail neema gağ teevq teiv-nvq gaoğ aol lal-a nail ngaol. <sup>8</sup> Nuljuq Yeiqsul nail lavqkhoel bhai jaol ivq dal laivq hağ neq, nvjuq aqdoevq doevq dal laivq maol

tsaol khi, neesal ya nail ngaol. <sup>9</sup> Nuljuq nail haqbhoil Miqyail bhai niil aq-il nvjuq tsiqeeq deedee nail ngaol. Khul khi mail dai ngal-aq neq, nuljuq bhaqda nee aivq nail sivtavq bhai nvjuq lavqkhiq ya tsail-a nail ngel-i mail ngaol. <sup>10</sup> Nvjuq nuljuq bhai gaoq ya moel khi, nuljuq nail neema thaqtsaol nail maq bhee nail juq bhai bhee lal dai, nqkiv n-gaol maqkhaiq, nvjuq geeqłaoq hal deedee nail ngaol.

<sup>11</sup> Nvjuq nuljuq jaol nail bha lal kivq dai, ngadao nail Aqbhu Miqyail khi mail ngadao nail Heeqphaq Yeiqsul nvjuq nail haqbhoil gailkhaol lav daol lavq dei-eiq. <sup>12</sup> Nvjuq nuljuq bhai gaiq-a nail khe-ai, nuljuq iqsanl teevq gaq nee teevq gaq gaiq-a nia jaiq lal khi bhee lal dai maqkhaiq, tsaol-aq iqsanl bhai gaiq-a nia jaiq lal dai maqkhaiq, Yeiqsul nuljuq nail neema lavqkhoel bhai goil nail gaiq-a nail pha q bhi mao lal dei-eiq. <sup>13</sup> Ngadao nail Heeqphaq Yeiqsul, aivq nail tsaol-aq iqsanl nee mail teevq gaq khe-ai yavq kha lee-u phao, ngadao nail Aqbhu Miqyail nail sivtavq bhai, nuljuq nail neema aqhaol haol dai aol khi, oeqbal tha q duq maq jiav dai, aivq nuljuq nail neema bhai bhi ivq lal dei-eiq.

## 4

*Miqyail neekhaol sil dai aqdoevq khalhai ya doevq nail ganl*

<sup>1</sup> Aqivq jaqbheq juq-ol, nvjuq Heeqphaq Yeiqsul bhai juq khi, nuljuq bhai niailhai hal hal-ail, gaq bivq movq-ail haq nail ngaol. Nuljuq Miqyail

neekhaol sil dai, aqdoevq khalhai ya doevq nail ganl nvjuq nuljuq bhai cavq bhiq cov bhiq-a nail ngaol. Niil aq-il nuljuq tsaothe thailthaiq nail khe-ai, iqmoeq phao iqsanl a dai nee maq tsil tsaothe dav laivq yaoq. <sup>2</sup> Nvjuq Heeqphaq Yeiqsul nail bhaqaoq bhai juq khi, khalhai ya doevq ya jaol nail ganl cavq bhiq cov bhiq-a nail bhai nuljuq heeq nia nail ngaol.

<sup>3</sup> Nuljuq aqhaol haol dai doevq khi khaqmiq maq sev dai doevq haq neq, Miqyail neema tsaq nail ngaol. <sup>4</sup> Nuljuq yaoq gaq yaoq-ao nee yovqgavq nail aqmaol bhai yovqgavq gaq lai nail lavqkhoel nee aqhaol haol dai jaol khi yovqgavq nail khaqma bhai ev khi aqmeeq-ai doevq tavq jaol tavq yaoq. <sup>5</sup> Miqyail bhai maq heeq nia nail yu nail jeq-e jaq-a yovqgavq nail neekhaol teevq sil doevq tavq jaol tavq nail khe-ai, nuljuq maq ya doevq-ail. <sup>6</sup> Tsaol-aq teevq gaq-ail yovqgavq nail aqivq jaqbheq Khali yaq juq-i mail aqtsaoq hal bhao-ai thaq nail bhai maq ya bheeq maq ya leel-ail, maq ya kav jaq-ail dai, jel lal-u phao nvjuq nuljuq bhai aqmeeq-ai cavq bhiq-a nail khe-ai, Heeqphaq Yeiqsul neq, alhai nl nail tsaol-aq bhai yalkhaq dal bhiq nail ngaol. <sup>7</sup> Khul khi mail dai ngal-aq neq, agjiivq aqcavq nail haoqnao bhi doevq nail dai khi, Miqyail ngadao juq bhai khul-a nail maq ngel-ail. Aqmeeq aqhaol haol dai bhi doevq nail haqbhoil Miqyail ngadao bhai khul lavq-a nail ngaol. <sup>8</sup> Alheel ngel-i mail, daoq al juq bhai khaonq nail tsaol-aq neq, tsaol-aq nail daoq bhai khaonq nail maq ngel-ail. Nuljuq nail lavqkhoel bhai Meeqnail Haolnail Aqhaqlal bhi jaol lee-a

nail Miqyail al gaq nail daoq bhai, khaonq nail ngaol.

<sup>9</sup> Aqivq jaqbheq Khali yaq nail gaiqlaq bhai khalhai ya goil ya gaiq-a nail ganl nvjuq nuljuq bhai haoqgavq gevq bhiq nail maq loq yaoq-aol. Khul khi mail dai ngal-aq neq, teevq gaq nee teevq gaq gaiq-a yaoq dai, Miqyail nuljuq bhai cavq bhiq cov bhiq gaq-ao nail ngaol. <sup>10</sup> Maldil dai, ge haq neq, nuljuq jaol nail Maqgeiqdaolnil milkhaoq khaog lao bhai jaol nail aqivq jaqbheq Khali yaq iqsanl bhai gaiq-a nail ngaol. Thailhai ngaol-aog, aqivq jaqbheq juq-ol, a dai nee maqt-sil aqyu juq bhai gaiq-a jaiq lal yaoq dai, nvjuq nuljuq bhai gaq bivq nail ngaol.

<sup>11</sup> Nvjuq nuljuq bhai ge bhiq-ail ceevq-a nail khe-ai, laijai nail lavqkhoel nee, neema ivqdao dai jaol khi, yu nail ganl bhai maq suqsaq-ail mail, yovqgavq nail ganl nl nl-ail doevq dal laiq yaoq. <sup>12</sup> Alhai doevq haq neq, Yeiqsul bhai neema maq thaqtsaol nail juq, nuljuq bhai ev khi yovqgavq loq nail phağ, yu bhai maq ya juq mail aqdoevq doevq kivq lal nail ngaol.

### *Heeqphaq Yeiqsul yavq kha lee nail ganl*

<sup>13</sup> Aqivq jaqbheq juq-ol, khul teevq phağ-ail noeqthunq nail phağ maq jiav nail tsaol-aq noeqhaq nail khe-ai, nuljuq maq ya noeqhaq dai, sil jel-a nail tsaol-aq nail ganl nvjuq nuljuq bhai bhi heeq kivq movq-ail nial. <sup>14</sup> Yeiqsul sil khi gaoq doevq kovq lal-a nail ngaol dai, ngadao neema thaqtsaol nail ngaol. Alheel ngel-i mail, Yeiqsul bhai neema thaqtsaol khi sil-a nail juq bhai Yeiqsul nee mail teevq gaq khe-ai, Miqyail

hevqkovq lavq naol dai, ngadao neema thaqtsaol nail ngaol. <sup>15</sup> Nvjuq Yeiqsul-i mail cavq-a nail daoq bhai juq khi nuljuq bhai niailhai ge lavq bhel. Yeiqsul yavq kha lee-u kev dai, aqdoevq doevq thailthaiq nail ngadao juq neq, sil jel-a nail tsaol-aq juq nail iqmoeq nee ya kev lai nail maq ngel-ail. <sup>16</sup> Yeiqsul nqtavq kovtavq nee yavq kha lee-u phao, daoq bivq nail aqthel bhai maqkhaiq, eeq jaiq nail nqtavq gaqkhoel gaq nail aqthel bhai maqkhaiq, Miqyail nail nqbho jiiv nail aqthel bhai maqkhaiq, ya gaiq nail ngaol. Aq-u phao, Yeiqsul bhai neema thaqtsaol khi sil jel-a nail juq iqmoeq gaoq doevq kovq lal nail ngaol. <sup>17</sup> A bhai nee ngal-aq, aqdoevq doevq nail ngadao juq iqsanl aqyu juq nee mail teevq gaq khe-ai, nqdil jiav duq bha tsiq dal lai lavq khi daqmoe bha Yeiqsul nee mail ya thaoqphuq lai nail ngaol. Alheel ngel-i mail, ngadao juq Yeiqsul nee khaq mao iqsanl ya jaol nail ngaol. <sup>18</sup> Alheel ngel-i mail, nuljuq teevq gaq nee teevq gaq ganl niil ge ge-ail gaq bivq yaoq.

## 5

*Heeqphaq Yeiqsul yavq kha lee nail haqboil lainq-ai thaq yaoq*

<sup>1</sup> Aqivq jaqbheq juq-ol, Yeiqsul yavq kha lee nail yanq yanq lao khi aqkovq aqlav nail ganl, nvjuq nuljuq bhai gevq bhiq nail maq loq yaoq-aol. <sup>2</sup> Khul khi mail dai ngal-aq neq, hul-iq tsilma khoiqbhaoq bhaoq lee nail khe-ai, Yeiqsul yavq kha lee nail aqn kev lee nail ngaol dai, nuljuq heeq nia nail ngaol. <sup>3</sup> Milkhaoq sal lal khi,

geesil nail maq jiaq yaoq-aol dai, yu ge thailthaiq-u phao, luq-ail seil-ail nail pha q aqyu juq nail kovtavq bhai kev lee nail ngaol. Yaq tsiq nail aqyanq tsaq lal-a nail aqma teevq gaq ovqmav nal dov lal-a nail khe-ai, thaiqphuq dai kev lee khi, aqyu juq maq jel-ail nia-ail.

<sup>4</sup> Thailhai ngaol-aog, aqivq jaqbheq juq-ol, nuljuq neq aqnav nail lavqkhoel bhai jaol nail tsaol-aq maq ngel nail ngel-i mail, Yeiqsul lee nail aqn aqyanq al khoiqbhaoq bhaoq lee nail khe-ai thaiqphuq dai, nuljuq nail kovtavq bhai maq kev lee-ail. <sup>5</sup> Khul khi mail dai ngal-aq neq, nuljuq iqsanl aqbhaq nail lavqkhoel bhai jaol nail yaq khi, n-gaol nail yaq ngaol. Neema thaqtsaol nail ngadao juq neq, nqkiv nail yaq khi, aqnav nail lavqkhoel bhai jaol nail yaq maq ngel-ail. <sup>6</sup> Alheel ngel-i mail, yu iqthaiq kovq-ai thaq nail khe-ai, ngadao iqthaiq iqthaiq-ail maq ya jaol-ail. Ngadao aqmeeq-ai yovqgavq nail neema bhai yovqgavq gaq lai khi aqgeel geel dai, ya jaol nail ngaol. <sup>7</sup> Khul khi mail dai ngal-aq neq, tsaol-aq yaq neq nqkiv phao iqthaiq nail ngaol. Jilpheed daol bov nail tsaol-aq juq iqsanl, nqkiv phaoq daol bov nail ngaol. <sup>8</sup> Ngadao neq, n-gaol nail yaq ngel-i mail, yovqgavq nail neema bhai yovqgavq gaq lai bhel. Neema thaqtsaol nail pha q khi mail goil nail gaiq-a nail pha q bhai, doeq daq duq khe-ai doi khi, hevqkovq nail pha q ya dai, noeqthunq nail pha q bhai hail uqtsaoq khe-ai tsaq khi jaol bhel. <sup>9</sup> Khul khi mail dai ngal-aq neq, Miqyail aivq yalkhaq dal nail pha q bhai bhi daq nail dai khi, ngadao bhai tsel dov lavq-a nail maq ngel-ail. Ngadao nail Heeqphaq

Yeiqsul Khali bhaqda nee hevqkovq nail phağ ya dai, aivq ngadao bhai tsel dov lavq-a nail ngaol. <sup>10</sup> Yeiqsul yavq kha lee-u phao, ngadao doevq khi ngaol-aog, sil khi ngaol-aog, aivq nee mail teevq gaq khe-ai ya jaol dai, Yeiqsul neq, ngadao juq nail haqbhoil sildan-a nail ngaol. <sup>11</sup> Alheel ngeli mail, niil aq-il nuljuq teevq gaq nee teevq gaq gaq bivq khi, eeq lal heel lal thailthaiq nail khe-ai, iqmoeq phao iqsanl nl dal laivq yaoq.

*Paolluv aqyu juq bhai gaq bivq-a nail ganl*

<sup>12</sup> Aqivq jaqbheq juq-ol, nvjuq nuljuq bhai niailhai hal nail ngaol. Nuljuq nail lavqkhoel bhai Miqyail nail ganl nl nail juq bhai ev yaoq. Aqyu juq neq, Yeiqsul nail aqmil kov-uvq nee nuljuq bhai heldaiq phail khi, aqmeeq-ai cavq lavq cov lavq nail ngaol. <sup>13</sup> Aqyu juq alhai nl-a nail bhaqda nee nuljuq nail neema lavqkhoel nee aqyu juq bhai gaiq-a khi mailma-ail ev yaoq. Alhai dul dai, nuljuq nail gaiqlaq bhai iqsanl tsaq lai jil lai yaoq. <sup>14</sup> Aqivq jaqbheq juq-ol, nvjuq nuljuq bhai gaq niailhai bivq nail ngaol. Khul teevq phağ iqsanl maq nl maq hal nul nail tsaol-aq bhai aqmeeq-ai cavq bhiq cov bhiq yaoq. Al ovqtavq, geesil nia nail tsaol-aq juq khi gaq bhaq nail juq bhai iqsanl gaq bivq yaoq. Tsaol-aq iqsanl nail kovtavq bhai neema heelma ma dai, thağ yaoq. <sup>15</sup> Yu aqdoil phağ nl lal khi ngaol-aog, aqdoil phağ teevq gaq bhai iqsanl thağ nl kovq bhiq. Nuljuq nail gaiqlaq bhai maqkhaiq, tsaol-aq iqsanl bhai maqkhaiq, khağ mao iqsanl aqmeeq phağ taivq-ail ya nl bhiq dai, laijai yaoq.

16 Khaq mao iqsanl lavqkhiq tsail yaoq. 17 Maq ceiv lai dai, geeqlaoq hal yaoq. 18 Khalheel phağ bhai ya thaoqphuq khi ngaol-aog, Miqyail bhai tsiqeeq yaoq. Nuljuq Yeiqsul Khali nail lavqkhoel-ai aqdoevq alhai doevq nail bhai Miqyail neema tsaq nail ngaol. 19 Aqhaqlal Miqyail nl nail hal nail bhai thağ lav tsoiq. 20 Miqyail nail haqbhoil gedan nail juq nail daoq bhai khal ge movq-ail thağ ge. 21 Thailhai ngaol-aog, yaoq phağ yaoq-ao nee aqmeeq-ai tsaotseł daiq khi aqmeeq phağ bhai nieivq thaiq-ai thağ yaoq. 22 Maq meeq nail yaoq phağ yaoq-ao nee bhai, gail jao jao yaoq.

*Haoqnao naoq saq khe daoq khi geeqlaoq bivq nail daoq*

23 Ngadao bhai neesal-ovq nail phağ bivq lavq nail Miqyail nuljuq bhai teevq bhee teevq lovq bhi meeq bhi haol lal khi, ngadao nail Heeqphağ Yeiqsul Khali yavq kha lee-u phao, nuljuq nail neema, aqmaol, aqhaqlal iqsanl bhai, oeqbal thağ duq maq jiav dai, Miqyail heldaiq phail dei-eiq. 24 Nuljuq bhai khul-a nail Miqyail neq, nuljuq bhai alhai heldaiq phail lavq nail ngaol. Khul khi mail dai ngal-aq, aivq neq, saljial ivq nail ngaol.

25 Aqivq jaqbheq juq-ol, nvjuq nail haqbhoil iqsanl geeqlaoq hal tsao lavq yaoq. 26 Aqivq jaqbheq Khali yağ juq iqsanl bhai meeq nail haol nail lavqkhoel nee, aqlavq he yaoq. 27 Haoqğavq niil aqivq jaqbheq Khali yağ juq iqsanl bhai ge daiq bhiq yaoq dai, ngal Yeiqsul bhai juq khi nuljuq bhai hal nail ngaol.



<sup>28</sup> Nuljuq nail kovtavq bhai ngadao nail Hee-  
qphaq Yeiqsul Khali nail geeqlaoq eeljaol jia  
dei-eiq.

**Jalliq aqsivq Gaolkheel daoq**  
**Akeu: Jalliq aqsivq Gaolkheel daoq New Testament**  
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
aaaba9fd-8172-55cc-ad15-906f43ddb5a5